

A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

ဝဏ္ဏ-ဗုဒ္ဓ-ဝဏ္ဏ ဝဏ္ဏဗုဒ္ဓ

Vol. 62 || No. 03

March, 2026



Editor: Rev. Zamlianpau

Kumpuon

“Khrist a kipumkhatna”

[Johan 17:22]

Khristian Tangkou

Vol. No. 62 || Issue No. 03 || March, 2026

A sung thu

Editorial Board

Editor	: Rev. Zamlianpau	- 7629978067
Joint Editor	: Rev. G. Mangmuanthang	- 9862118809
Cir. Manager	: Upa Jamsianmung	- 9862086615
	Nu Niangkhanmang	- 9863934719
Bus. Manager	: Nu Suanneiching	- 8787790520
	Nu H. Naomi Goulianching	- 8413854088
	Mr. S. Joel Lianmung Zou	- 8729906706
	Shie Laangkhanlal	- 9612502599
	Mr. Kapkhanthang	- 8119040460
	Shie Khaiboi	- 9362647470
Cont. Editors	: Rev. Awnkhanhup	- 9383114081
	Rev. Dr. Hangpi Manlun	- 9862910875
	Upa Suankhanmang	- 8730946698
	Upa Thangzasuan	
	Upa Khupsuankham	- 9863193371
	Upa Langkhanmang	- 8787726568

ZOU SYNOD ULIENTE

- **Moderator:**
Rev. Khamminlian
- **Moderator Elect:**
Rev. S. Ginlianmang
- **Secretary (Sr):**
Upa Khaiminlian
- **Secretary (Jr):**
Upa Jamgentshang
- **Treasurer:**
Upa S. Nangkhanlal
- **Statistician:**
Upa Hangsuanthang
- **Executive Secretaries:**
Rev. Dr. Hangpi Manlun
Rev. Zamlianpau

- Editorial..... 01
- Thu tuomtuom & Thumpi ding 02
- Jesu Khrist a um Pasian tan..... 05
- Mipil lina, Arbatan 07
- Tep-le-muomten 09
- A taan ngamten a taan hetsih uh.. 12
- Suunna 14
- ZPWF Column 20
- ZPYF Column..... 24

If undelivered:
Please Return to:
The Editor
Khristian Tangkou, ZPCS Office,
Zomi Colony, Post Box-48,
Churachandpur, Manipur-795128

Copies - 1200

AMAN

Kumkhat ah	- Rs.	100
Post ah	- Rs.	200
Copy khat ah	- Rs.	10
Life Member Fee	- Rs.	1,000
Patron Member Fee	- Rs.	2,000
Memorial gift	- Rs.	2,000

Thusuo zousie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



EMAU LAMPI! PASIAN TOH ZAWHKHAWM

(Mk. 16:12-13; Lk. 24:13-35 & Mak. 16:15-18)

Lai Siengthou ah Pasion toh zawhkhawm tamtah umte lah ah Palm Sunday, Good Friday leh Easter Sunday zang ding i hi uh toh kituoh in Emmau khuo zuon a pei mi nite Mangpa Jesu toh a zawhkhawm thu uh i houlim ding uhi.

Ei Presbyterian Church of India, thugin khu Pasion a mi thum, Pa leh Tapa leh Hagau Siengthou (Trinity) ahia, amauteng khu mi thum hinapi in mi khat ahi veve ua, tam khu sakhuo dang zuiten a theisiem theilou uh ahia, Pasion a hinna nei Jesu Khrist gingtute bou in i theisiem thei ahi uhi.

Pasion khu Thuhun lui lai in Pa Pasion in a kithei a, Thuhun tha hing kipat AD bul lam in Tapa a hing kilang in i Mangpa Jesu shi zou in Hagau Siengthou a hing kilang in ahing umpi zing hi. Thuhun lui lai in Tapa leh Hagau Siengthou thu Pasion in Jawlneite zang in gen nanleh ana theisiem theisih ua, atah a mu thei zong ahi naisih hi. Thuhun lui hing bei in Jawlneite genlawh bang in ahing tangtung tou a, Jesu Khrist hing pieng in ahing shi a, tuachiin thou kia in van a lahtou in a um a, tua zou in Ahing thuchiem dungzui in Hagau Siengthou ahing sawl hi. Tuachiin, eite khelna a shisate hing tankhie in kumtawn hundamna ahing pie a, Pasion a mi thumte khu Thuhun tha ah hing kilang in ahing bukimta hi. Tu in i thupi uh i genta ding uhi.

1. Emmau khuo:

Emmau khuo khu Jerusalem khopi apat mallam a um mel 20 vel a gamla ahia, Jerusalem leh Jaffa khuo kikal a um ahi hi.

Emmau chi umzie khu Greek ham ahia, 'lungtang a deina tah nei' china ahia, tualeh, tuilum pawtna tuisam china zong ahia, tam mun ah tuisam khat a um a, tua khu tahsa damlouten damna a ngana mun uh ana hi leng hi.

Tuazieh in tam tuisam mun khu mi tamtahte kinepna leh damna mun ahi. Tam bang in nuajui mi niten zong tam Emmau khuo ah hagau damsiengna ana mu uhi.

2. Emmau khuo zuon mi nite:

I Mangpa Jesu Khrist khantan hoi gieltu Dr. Luk in, tam thu kimtah in ahing na gelsah a, tam Emmau khuo zuon a peite khu Kleopa leh a lawipa ahi uhi. Amaute khu amin uh nuajui dangte bang in Jesu nuajuite lah ah simkhah hisih nan uleh Jesu gingta a, anua zuitute ahi uhi.

Jesu han apat a thawkia zou in a nuajuite kung ah a kihil a, a gensa ma bang a thou kia ahi dan chientah in ahil hi. Tam Jesu thaw kia ni mama a nitah lam a Jerusalem leh Emmau khuo kikaal a sil tung ahia, Jerusalem apat Emmau khuo zuon in Kleopa leh a lawipan lungkham meltah leh daa mel tah in lam a zawt ua, Jesun amau toh zawhkhawm ding in ava nai a "Na pei kawm ua bang thu houlim a, tambang a daamel puo na hi uoi?" chiin adong hi. Tam khuolz in mi niten Jesu ahilam theilou in Jesu Kross a kilbeh ahi thu leh aluong kiphumna mun ah a um nawnlou thu gen in Kleopa in, "Tulai a sil umdan theilou i? Jerusalem ah nang maimai mikhuol na hieimah?" achi hi. Jesun amaute kung ah "Bang sil umdan la?" chiin theilou bang in a dong kia a, Kleopa leh a lawipan Jesu shi dante, Jesu hina leh silbawlthei dante, Siempuliente leh Vaihawmten shi ding a, a mawpai thu uh leh Kross a kilbeh ahi dan, ashi dan thute gen in a thou kia a, nuajuite kung ah zong a kihil chiin a gen ua, a thawkia dan gen nan uleh a lungtang sung uah theichienna tahtah a um lou zieh in a da mama mai ua, a lungsim uh hawm in a thawmhau mama mai uhi.

A lungkham seng zieh un Jesun a damlai a, a thugente zong za napi in a manghil ua, thei zoulou in a um uhi. Lungkham leh danate in i mit mielsah in i lungtang a zingsah leng hi.

Tuahun lai in Jesun Ama tungtang thu Mosi leh guolneiten ana genlawhte uh; Khrist in a thuoh ding a, shi ding mawng ahidante leh kaithaw a um a, thupina atan ding thute hilchien in Lai Siengthou sung a kigenlawhte thu a hilchien chieng in a sung uah mei bang in a kuong a, hinanleh a theisiem nai sih uhi.

Jesu toh zawhkhawm ahi vang un bangma a theisih ua, ahin, a lungkhamnate uh kiem in nuom asa mama ua, Jesu toh zawh a Pasian thute a kikap lai un a lungkhamnate uh a manghil uhi. Tambang a houlim kawm a, ahing pei uleh a theilou kaal un a zotna mun uh Emmau khuo ahing tungta uhi. Jesu khu gamlapi a peisuoh ding bang in a kigen a, amauten Jesu ahi theisih nan uleh a ngaina mama ua, akung ua um a taam phot ding in a hou/chiel uhi. Tuachiin, “Ni lah tum ding hita, khuo hing miel ding ahita a, kou toh taam in giehkhawm vai” chiin ahou uhi. Tambang a Jesu ahou chieng un Jesu zong amau toh giehkhawm ding in a lotta hi. A giehna ding uh Emmau khuo ah nitah ann nekhawm ding in atouta uhi. I Mangpa Jesun tanghou ala a, phalsuo in a guolzawl a, tuachia tanghou aneh lai un amit uh hing vaah in Jesu ahi lam ahing thei ua, hinanleh tam hun laitah in Jesu khu amaute mitmu apat a mangta hi. Amau tegel kihou in “Lampi a ahing houpi a, Lai Siengthou thute ahing hil lai in i sung ah meikuong abang hilou i?” chiin a kihou ua, tuachiin a giehna ding uh Emmau khuo ah zong gieh talou in Jerusalem lam ah kile kia in nuajuite kung ah a sil tuohte uh gen in “I Mangpa a thoukia tahtah ahi. Simon kung ah zong a kilah ta hi” achi uhi.

3. Eite kung ah:

Tam Emmau khuo zuon a pei mi nite leh nuajuite bang in eite zong i kineppi mama i lamkaipen pa khat hing kimatpieh in hing kitha piehle bangding in zau leh thawmhau in umlou ding idiei? I Mangpa Jesu ngel zong Kross a, a shi ding kuon in a thawmhau a, “Pa aw, bang ding a nei taisan ahiei?” chiin a kikou hi.

Tuniin mi tamtahten i lungkham, i mangbat niin I Mangpa Jesu hing chielna theilou in Zu-le-sa in a kihenem ua, tep-le-muom, khamthei-guithei leh kimawl na hoilou tahtahte toh a kihenem uhi. I hagau

dangtah mama damna ding in hagau tui dawnlou in tahsa tui i dawn uhi. Ita-le-naute Jesu toh a zawh lou zieh un a hagau dangtahna uh theilou in tahsa lam dangtah bang a kithei in khamthei-guithei sal ah a taang uhi.

Emau khuo zuon mi nite bang in tuni tan in i Mangpa Jesu khu eite toh zawhkhawm ut in ahing chiel zing a, i lungkhamna-danate hing henem nuom in “Bang thu atai na buoipi” ahing chi hi. I Mangpan i buoinate hing suhveng pieh ut in ahing dong zing a, eite a ding a hing shi in thou kia nanleh eiten ama chielna i nahsah lou uleh ama thu in ahing kilai tahla theisih hi.

Jesu Khrist zieh in Ama phatna lasah nuom isa un, phatna Lapawlte bang i ngai nuom mama maithei uhi. Hinanleh ama i saanlou zieh un eima tang a i um chieng uleh solna i tuoh chieng un i dou zou sih uhi. Tuazieh in Biehinn sung i tun chieng un ahing a vangam kai thei ding khop in ihoi ua, hinanleh kholai ah Jesu toh i zawhkhawm lou zieh un gitlouna lungsim toh i pumdim uhi. Emmau khuo zuon a pei Kleopa leh a lawipa bang in i kung ua Jesun ahing nai zing lai in ama chielna pom in zawhkhawm in taamkhawm in, annekhawm lei i hagau mit ahing suhvahsah ding a, heisung mun ah zong ama deilam bawl in i lungnuom thei tading uhi.

I Lungkham mangbat ni, i thawmhau ni chieng un Jesu thugente ngaituo zel henlen hilei i lung a hing kihong ding a hamuonna i nei thei ding uhi.

Lawmta niten, Jesu hina a theichien tah chieng un mawh um thei talou in, Emau khuo a gieh ding a kisa hinan uleh gieh talou in azanzan in Jesursalem manaw in apei ua, nuajui dangte kung ah a thu thei uleh a mute uh a gen pai uhi.

- Eite zong Jesu Khrist a kitheichienna/pienthana inei mai uah a hunsih a, Mangpan athu puongzah ding in ahing dei hi.

* Mak 16:15-18 ah “Tuachiin akung uah, Vanney buppi ah pei unlen michin kung ah Khantan Hoi thu va ge ta un. Tuachiin koi zong a gingta a, baptisma tang tapou hutdam in um va un, hinanleh a gingtalou pouma khu siemmaw tansah in um tava. Tuachiin ginna nei zousie sillamjang bawltheina tha kipe van: ka min in dawi deldoh va un; gul aman un zong gu a dawn kha un zong sukhkha in

um sih va uh. Tuachiin chinate tung ah khut ngam va un, tuachiin dampsah ta va uh” achi bang in i thei thute genkhe ding leh shi tanpha a theipitute hiding in Mangpan ahing dei hi.

@ Hamsatna chinteng a kipat in hing tankhe lou ding hinanlezong Mang dang chibai buh thei kahi nawnsih.

Mangpan zawhkhawm ding in ahing chiel zing a, Thuhun lui ah Mosi leh Jawlneite Pasion toh a zawhkhawm ua, i Mangpa Jesu lei a ahing len lai in anuajuite ama toh zawhkhawm ahi bang un tu Hagau Siengthou hun ah Hagau Siengthou toh zawhkhawm henlen hilei i damsung nite ama dei dan bang a gamta in i Gam sung, i Nam sung, i Hattuum, i Innsung leh i mimal hinkhuo a dam ding a, nuomsatah in tam leitung ah i khosa thei ding uhi.

Mangpan A gam kehlien sem thei ding in hing mapui chietta hen.

.....

Thu tuomtuom
leh
Thumpi dingte



1. Pasion lungsietna leh mapuina toh February 2026 zang zou in March ha ah i lut tou kiata ua, tam tan hing puitu i Bieh Pasion mi phat in a kung ah lungdam thu i tut masa uhi.
2. Tu ha sung in i Khristian hinkhuo kingatna uh Palm Sunday, Good Friday leh Easter Sunday zang ding i hina uah Hagau leh tahsa a i phattuompi theina ding un eimate zong kisingsa in thum chiet va ui.
3. Pasion mapuina toh Zou Presbyterian Church, Pillangkata (Guwahati Area) Hattuum khu March 01, 2026 in honkhiet ahia, tua ahi toh kituoh in a enkoltu ding Pastor koi ngai ahina ah Inter-Arrangement bawl tha in Rev. MG. Nehlien koi ahia ama umna mun Chennai ah Tv. T. Thangmuansang koi ahi.

4. I Mangpa Jesu thugen tangtung zel in gam leh gam, nam leh nam kidou in thuthang damlang tuomtuom a hing um a gingtute i umna chiet ua gin-um tah a Mangpa a ding a um chiet ding in thumna toh pang chiet va ui.
5. 22 vei Synod Vahawmna Khawmpi in a gel bang in Pastor-te a umna ding uh (Station) chiet uah tung chietta ua, amaute a ding in thumpi chiet va ui. A umna thate uh:

No.	Name	New Station
1.	Rev. Kapsuanthang	Central (A)
2.	P/P. Thangmuansang	Chennai
3.	Rev. Khupkhansuan	Central (C) (Home Base)
4.	Rev. P. Ginzalal Zou	Lentang (A)
5.	Rev. Suangliankap	Lentang (B) (Home Base)
6.	Rev. Kaimuanlal	Lamka (A)
7.	Rev. Dr. Hangpi Manlun	Lamka (B) (Home Base)
8.	Rev. Lamsuanthang	Tuining
9.	Rev. Samuel Khamsuankhai	Suolam
10.	Rev. Khupsianlal	Gunpang
11.	P/P. S. Mangminlun	Gunpang Saiboh
12.	Rev. Thangboi Khuongsai	Moreh
13.	Rev. Khamminlian	Singngat (A)
14.	P/P. L. Kapmuanpau	Maokot
15.	Rev. M. Gouginsang	Tuivai
16.	Rev. S. Ginlianmang	Zoutang
17.	Rev. G. Mangmuanthang	Office
18.	Rev. Semion Khamlianhang	Shillong
19.	Rev. Kamminthang	Delhi
20.	Rev. Joseph Doulunlal Samte	Bengaluru
21.	Rev. Zamlianpau	Office
22.	Rev. MG. Nehlien	Pillangkata (Guwahati)

10. Pasian lungsietna leh miki phalte zal in Missionary Field a Biehinn lamna ding a sum tuoh kibelp zel a, Mission & Evangelism Committee thuphasah bang in Biehinn lamna kipan paita ding ahina ah lam zaw ahi a, i Mission Field ua gingtaten Pasian a bieh ding bang tah ua a bieh theina ding un i thumna uah laan chiet va ui.

~~~~~

## KHRIST A KIPUMKHATNA

Johan 17:22

*By:- Upa Suankhanmang  
Tangpijol*

Jesun Hagau siengthou pieh achiem thute, Hagau siengthou nasepte leh ahina ding leh athawkiana ding thute, agenzou in, Jesu Vanlam nga in adahtou a “Paw aw, chi in nuazuite a ding leh gingtute a ding thungetna anei hi.

Jesu nuazuite khu Pasian in Setan doimangpa khut sung apan a atukhiet/alahkhiet a atapa Jesu Khrist apieh khiette ahi uhi. Tuachin nuazuite in Jesu Khrist khu Pasian apan a hing kipan a zawlneiten agenlawhsa bang a MESSIA ahi chi, athugente leh asil lamdang bawl apan in athei chien semsem uhi. Jesun anuazuite ading a athungetna leitung apan a keima nahing piehte kung ah na min ka theisah ta hi, ama ute nang a ahi ua, nang kei nahing pieh ahia, na thu azuita uhi, kei nahing piehte zousie in nang apat a hing kipan ahi chi ama ute in atheita uhi. Aziehpén kei kung thu nahing pieh zousie, ken ama ute kape sawnta a, ama uten zong apomkipta ua, nang nang a kipat

a hingpei kahi dan atheichienta uhi. Nangman nahing sawl ahi chi agingta ta uhi, “PA SIENGTHOU AW” Eigel pumkhat ihi mabang a ama ute zong pumkhat ahitheina ding un, NANGMAN NAHING PIEHTE NAMIN IN KAKEM HI, na thu ama uh kapeta a, leitung in ama uh amuda hi, KEI LEITUNG A KAHILOU MABANG IN, AMA UTE ZONG LEITUNG A AHINONLOU ZIEH UN NATHU AMA UH KAPETA HI.

**Tang 20 ah:** Tamte behbeh a dingín kahing ngensih a, hinanleh amaute THUGEN ZIEH A kei hing gingta dingte a ding in zong kahing ngen hi. I Mangpa Jesu in APA kung ah ama a ding leh nuazuite a ding a thu anget zou in,

nuazuite tungtawn a Khantanhoi hundamna thu mite kung a puonzahna peijel a, agingtate a ding in zong thu a ngen hi. Jesu Khrist amisiengthoute khawm a ahing pei kia tan a misiengthoute huom in thungetna anei hi.

Jesun apa kung ah nang leh kei pumkhat ihi mabang in, amaute zong pumkhat ahing hitheina ding un, nangman keima nahing pieh THUPINATE ken ama uh kapeta hi; PA in Jesu leitung a ITNA zieh a ahing sawl bang a GINGTUTE in zong a ITNA THU KHU Vannuoi a miten atheina ding ua PA LEH TAPA pumkhat ahibang a GINGTUTE ZONG KHRIST A PUMKHAT ahitheina ding in I Mangpa Jesu in athum hi.

Sawltah Paul in Rome khopi a suongkul atan sung in Ephesa Hattuohte kung ah KHRIST A KIPUMKHAT A UM DING in thuhilna anei a, HAT A NA UMNA UTOH KITUOH IN GAMTA un chin ngetna anei hi. “KHRIST A KIPUMKHATNA A UM THEI NA DINGIN” kingainiemna leh nunemna zousie, THUOHZOUNA toh itna

a kithuoh zou tuo chiet a um ding leh liemna gui a lakhom/kankhom a Hagau kipumkhatna tudet chinten ding leh kinepna munkhat luo ding a hat nahi bang un, tahsa khat leh Hagau khat a na um bang un, Mangpa khat, GINNA khat, Baptis khat, Pasian khat leh mizouse PA, bangkim tung a um leh, nou zousie a um Mangpa Pasian in pawlkhat sawltah hina, pawlkhat guolnei hina, pawlkhat khantanhoi genna, pawlkhat Pastor hina, leh pawlkhat thuhilmi hina apie hi.

Jesun amasa pen in Ama a dingin athum a, Anina ah nuazuite a dingin athum a, athumna ah gingtutetulaihunlehamisiengthou khop masang a GINGTUTE ading in athum hi. JESU PA LEH AMA PUMKHAT A HIBANG A GINGTUTE ZONG KHRIST A PUMKHAT AHI THEINA DING ATHUM HI. KHRIST A UM KHU PA A UMNA AHIA, HAGAU SIENGTHOU UMPINA ZIEH A GINGTUTE KHU PUMKHAT AHI CHIENG IN PASIAN THUPINA KHU MITE MITMU IN AKILANG DING HI.

# I HINKHUO UA PASIAN “SATAN”

By:- Upa Khupsuankham  
LDCC Hiangzou

(Deut. 6:4-9). Ei mihingten i gimna itawlna, ilungkhampi leh isum sunna tung ah theipina pahtatna kamsiem chite leh satan nei ilam en chiet ua, nei zong inei ua ineilou chieng un ihasiet law ua, i thasiet law uhi. I hinsa uh it a i naute apat in silhoi leh deisahna ilam en uhi. Lametna lawm ahia, kinepna taah zong ahi mawng hi. Tuachi mabangin Van a um ipa Pasion un zong asiemsa a kepsa leh avahsa eite apat in lamet anei hi. Bang angchi siem, bang ang chi kep, bang ang chi vah uh ahia, ichi uleh Eden huon apat angai hi.

- = Tungman apat in mihing asiem a,....
- = Ahu aha khum a ....
- = Aneh ding uh singga theiga apia a ....
- = Asil dinguh puon apie a ..
- = Aumna ding uh mun leh muol apia a .....
- = Ama thumang a amabe ding a siem a, Eden huon a te akep leh avah dandan khu eite ang kepdan ahi. Tuaziehin lam tuomtuom a hinkhuo imanna te ua Aman satan ineisah uh angai hi, athumang te leh abetute ihi theina ding un :-

**1) Biehna lam ah:** Biehinn ikaikhawm ua, thumna ineikhawm ukhu Pasion ibiehna uh ahi. Hun dang khat a thumna inei a Bible sim a kilatna inei uh zong biehna ahi. Mihon toh zong tua biehna bawlthei ahia, eima

ngentang a zong bawlthei ahi. Jacob in gampalah ah suong aphu (Thubul 23:18-20) khu Pasion abiehna ahia, sawm-a-khat pedia thuchiem abawlna khu Biehna kilahna ahi. Abraham in Isak Moria tang a alat khu (Gen. 1-12). Pasion a biehna ahi.

Biehinn sung ah ahi in eima innsung ah ahi in zong Pasion min loupai phatna leh Biehna bawlthei ahi. Pa leh nu khenkhat in atate uh beh Biehinn kai leh khawmpi mang ding in asawl sawl ua, amaun lah Pasion abieh seng sih uhi. Akhen dangkhat leuleu inlah atate uh ngaisah lou amauh behbeh akuon kuon uhi. Atah tah in chilei ei nu leh pa ten ita inaute uh Pasion biehna thu a ilamkai dinguh ahi. Alien aneu in Pasion ibieh ding ukhu ilungsim uh, a piehla ding uh china ahi, tua khu

Pasian in eite apat a satan atanna ahi.

Tuaziehin Biehna lam ah i PASIAN uh han chiet a biehchiet dingin i innkuon un chitah suo chiet in kideisah tua chiet vai, Jacob in gamlah a Pasian um a athei a abieh bangin i innsungte ah Pasian umna hisah dingin atha tha in panla vaui.

## 2) Sawm-a-khat leh anntangham

**ah:** Sawm-a-khat pieh ahi, initha uleh ilamtha uh sil leh sumte, i anntangham piehte uh eima mimal leh i innkuon sung ua, i Pasian un satan inei na ahi, chi ngaituo tha vaui, pilna siemna leh hausatna toh Pasian ana kibie ahi tuomlou khu eiten Pasian bieh theina leh ineikham kham uh tung a Pasian satan ipieh theina uh ahi ziehin ihampha uhi.

Sawm-a-khat a Pasian ibieh dante uh ngaituo pha vai. Anntangham ham a Pasian ibieh dante uh enpha vai in, atah tah a pelou leh dihtah a pelou a i umkhah ding khu pilvang vai in ki enpha va ui e. Sawm-a-khat pelou te khu Pasian suom ahi ua (Mal. 2:9) apedih lou te khu Pasian sol ahi uhi. Sawm-a-khat napieh dante leh anntang naham dante ki enpha in Pasian lungdamna chingla leh kilawm nasah leh bawlpah inlen Pasian

biehna dihtah hisah in mihing solte bon iki chiemte hia, Pasian solte vang kichiemte valeh ma ven maw. I Pasian uh ibieh dih theina ding un ineisa ilamsate tung ah, Ama satan ipieh hoi leh pieh dih sawm tha vai.

**3) Missionary lam ah:** Missionary nasepna ah a zingthou pan toh kibang nalai ihi uhi. Tangtah a Hagau mangthai lainatna nasepna khu sawm-a-khat lah a zong isim sih ua, atuom a kipiehna ahia, atuom liuliau a Pasian ibiehna uh chin theikhetha vaui, Missionary nasepna dingin ineisa ilamsate uleh inei ding ilam ding uh masot in silpieh nasatah a ipieh ding uh ahia, tua khu Pasian in ihinkhuo a nna isep gate ua pat a satan thupi atanna ahi. Tua gimna thuchiem bawl a Missionary nna isepnate uh ahun ding ahi nai sih a, kimkhat ama hachin amah, ahisih leh pieh dan tuomtuom 100/200 ichiemte uh ihinkhuo ua Pasian in satan atanna tahtah dingin homthaw ahuoi nalai ding hi. A petam apetawm ape neunou leh ape ngailoute khu Mangpan athei gige hi. (Nas. 10:1-4). Pasian in silpieh ipiena ua pat a achiemte ihina uah apetam a achiemte te hiding leh petawm a achiemte hiding deitelna pen eima ape tute a kinga ahi.

Tualeh tuabang silpieh ipiehna uah lungsim siengthou tah leh kiphaltah a pieh, ahia, i Pasian chiemtena tan ding leh laina vateh lou a pieh leh bawl hamham toh bang a chiemte hi ding deitelna zong eima chiet ah aum hi. Paul in (2Kor. 11:1-2) a agen bangin petam leh laina tah a pieh ding iki deisah mama uhi. Phaltah leh lainatah a piehna in sil piehna Pasian ibiehna uh anam atui sah mama hi. I silpiehte uh Pasian a ding a namtui mama dingin silpieh in Ama beva ui e.

**4) Itna nasepna ah:** (Nas. 20:35). Itna nasep ichi chiengin genthei liangvai chimaw, vangsie mi hin bang a hingla, mi nehsang nelate, china hi deu van in, tuabang ten a silpieh khieh khu i Pasian a ding a piehkhawm leh piehkhiehna ahia, i Pasian uh deilam ahisese hi (Deut. 26:12-13). Azieh (Condition) um vateh lou chipen nasep leh ann kang pieh ding, itna siengthou a gentheite panpi ibawl uh khu Mangpa masang ah gim namtui a ajamtou ngei ding hi. Genthei liangvai leh tasamte kithuohpina leh lainatna nasep khu thei khamkham a kithuohpina bawl ahi pen a sum ahi thei a, sil leh ten ahithe in, um leh bel ahi thei a, anntang, annkhing ahithe hi, itna in sil zousie ahuop hi (2 Kor. 13:3). Itna neiten Pasian mi hepina amau

thei pen uhi. Pasian khu itna ahi ngal a (Pro. 21:13).

**5) Dihtatna lam ah:** (Sam 21:1-3) Thuhunlui a dihtat ding a Mangpa Pasian in amite ahanthotna leh achiemna mun tampi ah muthei ahi. Dihtatna in nam atawisang a (Pro. 14:35). Dihtatna khu guoljawlna bul ahi. Dihtatna ziehin gimna leh gentheina um thei zing leh zong hun sot a dingin gahoi asuoh a, kipahna, minphatna leh Pasian kipahna asuoh hi. Deut. 25:13-16 in lei leh zua thu leh tehna dih a nasem dingin Pasian in Israelte a eng (demand) hi. Unau sanggam, innsah innhang leh imihing tanpite apat a summet zong nehlou ding ahi, tua khu i Pasian mitmu in dihtatlouna ahi ziehin (Deut. 23:19-20). Summet leh phoutamsien chite ei Pasian taten ibawllou uh ahoi a, ta tasem liangvai panpi kisalei zong puohgih asuoh hi.

Innsung ah, kholai ah, Hattuum leh Pasian nasepna lam tuomtuom ah dihtatna umna mun ah khantouna a um a, masawtna leh gasuona aum a, Khristian hina alamzang thei hi. (Eph. 6:4-15). Itna leh dihtatna Gospel in kithuom vai e.

**Thuzawna:** Luk 11:9-13, Phil. 4:8-9 “Ngen un piehin um va uteh, kiu un honsah in umva uteh” Eiten siltha, thutha, nasep ding tha

inei chiengun, kizouthaw sih va, kibawlthaw sih va chite ichi malam ut uhi. Ahivang in bawlsawm in bawl tupna lungsim khautah toh pang lei zaw lah leh bawlla umlou hi. I ngen ua pieh a i um thei ua, ikuu ua kot honsah a i um uleh nna khat poupou thumkawm in bawl zawna leh suhpichinna ikhut ua um ahi. Midang khenkhat leuleu in bawl sawm lou in ahoi dan ding leh aphot dan ding beh beh agen a gen khop uhi. Tutunga eiloi

bawltha ding a igente khu abawlsa i um uleh bawl semsem ding ahia, ibawl nailou i um uleh theitawp suo in bawlthei/bawlchiet tum in kisa in bawl zong bawl in sem zong sem khe ngei lei chi deina toh thuzawna isiem uh ahi. Athu tom leh zong nitah khat, sunkhat leh zingkal khat a dia guonggal ahibou ziehin akim louna zong umtham va.

Mangpa'n athu guoljawlta hen, Amen.

## **NASEP PANGLOU GINNA ASHI AHI**

**Jacob 2:14-17**

*By: Upa Thangzasuan  
Vaal Veng*

Ka unaute aw, min ginna kanei chi henlen, nasep neisih leh bang apah tuom diei? Tabang ginna in ama ahudam thei diei? Unaupa ahiei unaunu ahiei khat saguoh in um henlen, nichin neh ding tasam henlen, mikhat in lungmuongtah in um inlen, lumtah leh vatah in um in chi henlen, atahsapte petuom sih leh bang aphatuom diei? Tuaziehin ginna in nasep aneisih leh ashi ahi, achi hi.

Damlai khovel ah zingchin, zan chin a, shitheina nat theinate leh buoina simseng loute lai a, hinna, damna leh hun hoi hunpha hing tangsah ibieh Pasian kung ah nuomthu itun masa uhi. Tunia ihoulimna ding a ka hing tel khu nasep panglou ginna ashi chi thu poimaw va-ia mai phalbi nilum awi kawm in hing gen vang aw, gintatna ichipen tahsang china ahi, etsahna in lamka ah bongsa kizuo

ding hi chi igingta uhi, hinanleh igintat na maimai in Bonga hing nesah theilou ahi, neh ding i ut leh nasep in kal ava suon ding a va lei ding ahi, ava leituom sih leh igintatna a shi bangma phatuom lou ahita hi, tuama bang a, Jesu Khrist igintat leh athu man ding ahing sawl na pou a kuon ding tua hileh iginna ahing hiding ahi. Tuazieh a, ginna uleh nansep pen pankhawm ngeingei ding



ahi. Pankhawmna thu Isai 34:16  
sim masa vai aw, Mangpa laibuh  
ah, sui unlen sim un, tam thute  
akimlou khat zong a um sih ding  
a, koppi neilou zong a um sih ding  
hi, achi hi. I Mangpa Jesu zong Pa  
leh Hagau toh apangkhawm uhi,  
Laisiengthou zong Thuhunlui leh  
Thuhuntha a pangkhawm uhi.  
Adam zong Evi toh a pang khawm  
uhi, tuama bangin JCB zong ahepa  
a um sih leh nna asem thei tuom  
sih hi.

Koima ama tang a pangzou aum  
sih hi, mihat mama Golieth zong  
ama tangin apang zou sih a David  
in a lu atan pieh lel hi. Tuaziehin  
ka unau ngaitah te aw, iseppi lawm  
leh guolte polsiem vai, kithuohna  
leh kilemna del va ui, mi itam  
leh nuom ahi, sum leh pai zong  
tammai hi, kidousah sih vai, itung  
a mite zatat vai vaihawmte thu  
mang va ui, kituoh dildiel a um  
khawm anuom mama mai hi,  
Pasian mit gui tung zou dingin  
nna sem vai aw.

**Kihilna 3:1.** Pasian hagau sagi leh  
Ahsi sagi neipan tam thute agen  
hi, nna nasepte ka thei hi, shinapi  
in hing min na puo hi, khanglou  
inlen, shi dingkuonte phonghal  
in, aziehpén Pasian mai ah nna  
nasepte bukim in ka mu sih  
Sardis Httuom ten Pasian gingta  
uhi, hinanleh ana sem hoilou

uhi, phattuom nailou uhi, amite  
uh nuatawl sieng ding bang hi.  
Anasep uh Pasian mai ah bukim  
lou hi, shinapi uh ahing bang a  
um tammi thu in thu saupi ahing  
ngaituosah vengvong ahi, Sardis  
Hattuomte leh Lot a Pasian thu  
gendan deisahna umlou phattuom  
ngai lou hi. Siemchilbu 19:14  
tuachin Lot apot doh a, atanu te  
kitenpi amahpa te kung ah ava  
hil hi, Kisa unlen, tammun apan  
potkhie un, Mangpan tami khopi  
sumang ding ahi achi hi, hinanleh  
athu gen pen amahpa te ngai in,  
chiemmui bawl a bang giap hi,  
achi lel tah ahi.

Lot in itna leh lainatna toh deisah  
tah a thu avagen lou ziehin atu ata  
ten achie mmui hi ding ana sa ua,  
Sodam khopi toh aka lumta uhi,  
atugil atagil teng ataan ta hi, i Ji in  
atu leh tate angai zieh in anuahei  
a, Chisuong asuoh law nalai lai  
hi, bangzieh ama ichi leh Lot in  
phatuom ngaitah a avagen lou zieh  
ahi pen mai hi, tuaziehin atu, atate  
a dingin apu uh Lot pen shina pi a  
hing min puo ahina phatuom lou  
asuoh ta del mai hi.

Sardis Hattuom te leh Lot apan a  
zil ding tampi a um ding hi. Pasian  
a gingta ua, hinanleh nasep thu  
limlou uhi chi ahing ngaituosah  
mama hi, Pasian nna isep leh  
Pasian lungtun nadia sep ding mi

kung a thu igen leh aphattuompi thei ding uleh ahinpi ding kham ching a gen ding hasotna thu igen leh mi thanopna ding kham ching ahasot ding ahi, tua leh ahun amun leh amihing zil a ithugen atuomtuom ahiding ahi, Pasian thu ichipen abong bangin a um a, akhilkhil in akikhen ditdet hi, Hattuumte kung a gen ding aum a, Khanglaite kunga gen ding atuom hi, Numei te kunga gen ding a um tuom a, naupangte kung a gen ding zong atuom zel hi.

Khan touna ding thu aum a, pichinna ding thu zong a tuom

zel hi, i kumtawn hinna ding thu apoimaw bangin idam sung tomnou kal a lawm leh guolte toh i hinkhom diemdiem theina ding apoimaw zaw sem hi, tuazieh a thu igen leh miphattuompi thei ding lam lam te genpi ding ahi, tuahileh, bang ding a shi na pia hing minpue hing kichisese ding ahiei? Pasian thu zousie, hundamna ding ahikim sih a, Pasian laa zousie zong lampi thei ahi sih hi, Bible simtam louten Pasian in nang ahing thei diei chin dohna abawl ut mama uhi. Mangpa'n athute hing guoljawlsah ta hen.

## **M I T T A W**

(Mk. 8:23-25)

*By:- Upa Khaichinmang  
Tongdam P/Church.*

Khovel a mihing a ut dandan a umtheilou ichite khu mittaw te ahi ua, mittaw pa khun hindan umdan hasa asah ban ah, mivahte'n zong hasa isahpi mama uhi. Mittawte bawl thei atawm bang in, semtu mittaw te din bawl thei atawm mama hi. Local Upa/ Hattuum Upa, Semtute a umna ding mun a um loute khu Khristian hagau a mittaw te leh mittawpa aki lamdanna aum sih hi. Tam anuoi a bang in ihoulim ding uhi.

**Suon apa/nu a mittaw:** Nu leh pate'n itate uh kumtawn hinna anei leh neilou buoipi manlou, eima leh eima zong kumtawn hinna nei leh neilou, kibuoipi manlou, sum himei ibuoipi uh. Khovel a nopsah ding himei i utdan uh mittawpa tahsa a mittaw, ei nu leh pate hagau a mittaw, I Mangpa lah ahing naita mama hi.

**Local Upa/Hattuum Upa mittaw:** Local Upa leh Hattuum Upate akitelna mun a umlou te khu, mittaw pan mihingte amuh mielmuol toh kibang ahi, adia in Local Upate akhuo ua um a percent in ahoi mama a, Hattuum Upate khu a Belamte nuasie in khopi lam a um in, panmun lienpi dei nalai, thugen bang ki ut nalai,

mit miel ihi lam kithei lou in, Belamte din, ihinna pieh malah in, vaihawmni hing tung phut leh achinglou lemlum in i umkha diei Mangpa khu van ah Vansawlsieng aw toh hing kum taleh bang isuoh ta diei kingaisut hun mama ta e!

**Evan/Pro. Pastor:** Football peh ten Goal khum ding atop leh aniiim pen uh ahi bang in, Evangelist leh Pro. Pastor te atop uh leh aniiim khu Hagau Mangthai mat ding khu ahi. Pasion suoh nasem tahtah ahi uh leh Jesun amit anihveina akhoi leh amit in khuo amuh ta zieh in, innchin ah lutva un damloute, mangbange, meithaite, genthei liengvaite thumpi va un, hundam a um nailoute Khantanhoi hil in, damdoi inn a damloute va thumpi va un, mitvah ahi zieh in kitawl dua manlou in Mangpa Grep huon ah na asem vevaw ding uhi. Jesu'n mittaw pa amit khatvei akhoi pieh pa ahileh khuo amuh mielmuol a, semtu khuo muhmiel muol nahi leh Hattuum chin a Kulpit Sermon bawl in, na hun teng zang vachin tudinmun ah, Local Upa/Hattuum Upate kulpit Sermon kumkhat a tang zoulou zong um ahi. Kulpit Sermon toh Mangpa nasem a kingaite leh mittaw khuo muhmielmuol toh adanglamna aum sih hin ka thei va-ia hi. Mangpa khu kot phung

ah hing gei ta e ?

**Pastorte:** Pastor ichite khu mizousie mittuhna ahia, amauh gamtat dan Semtuten anua azui uhi. Jesu anuazui ten azui bang in, semtu zousie leh Local Belampu leh Belampu zousie in aketot nua azuite ahi uhi. Evant leh Pro. Pastor te ettawn ahi ua, mizousie adia mitvah neite ahi uhi. Tuazieh in hun awl nei man lou in, innchin ah khamthei Camp lah ah damdawi inn lah ah ahunte uh azang ua, “Pei ding ka mah khut gua keu a, Mangpa lamdawn ding ngai ngam lou in shina lusun a belum ten atuoh chieng in, a inn neite toh apuonat dan dah leh kapte hamuonin, asun azan chilou in, Lusun te lah ah aji atate ngai ngetngut leh zong azan gia maw hi. Tuachin hundam loute hundam in, ashi chieng un, kumtawn hinna tan ahidan leh ashi pa/nu apientha dan thute gen in, kulpit sermon hunzang atang man sih hi. Mangpa Annsieng thumvei ahawm khu, mitmiel toh kibang ahia, hagau mangthai amat leh mitvah toh kibang ahia, aumna a zong um peilou, Mangpa annsieng zong hawm manlou ahileh mittaw pa toh kibang hidingin gingtatna ka nei vevaw hi. Simtu zousie Mangpan hing guoljawl hen.

(HUN BEIKHIEL TA E NASEPDAN ENPHA IN UNAU)

# I HATTUAM TU DINMUN LEH MABAN

~T. Zamkhankhual Zou

Simtute chibai (Tami article ka gelh utna hun sawtpi ahita a hinanleh khat in mimal tah a analah khah ding ahisileh ahilou lam a geel a um khah ding zauna ziehin sawttah kana gelh sih hi. Hinanleh I dinmun etna in kigelh him him leh chia ka hing gelh ahia, bang ngaidan na nei ei ana simsuoh mawng mawng voi!!)

Tami itenna khovel bukimlouna leh hamsatna tamtah komkal a khosa ihi dungjui in koima buching tah a hinkhuo zang, lungkham genthei hasatna leh buoina khatzong neilou a hing umlou a, ikhom chiet in buoina kinei hi. A tangpi I et leh I lungkhamna leh ibuoina te khu ipoimaw sanga tamzaw I dei zieh, tuhunzahdan leh maban hun ding geelna hideu pen in muthei in um hi. Khenkhat ahile mimal tah a kizenlou zieh zong hithei hi. Jesu'n gentheina thuhte kungah hing pei unlen ka kungah na puohgih teng uh nuasie in noptah in hinkhuo mang un chilou a hinanle tambangin ana gen zaw hi. Nou semgim leh puohgih pote zousie ka kungah hing pei un, Keima'n khawldamna ka hingpe ding hi. Ka hahkol puo unlen, ka kungah zil un, aziehpén kei khu zainemtah leh lungtanga kingai ngiem tah ka hi; tuachi'n na hagau ua dingin khawldamna na mu ding uhi. Aziehpén ka hahkol a nuom a, ka puoh zong a zang hi," a chi hi. Eiten ahile I hahsatna

leh puohgih te zong po kengkung mai I buoina khat a umle koi ahiei kungah tai pai in ngaisah ihiloule nuah suh chibang kichiing thei mawh hi. Tulai Synod in sumle-pai giautauna/hamsatna kinei ahidan ithei ua, tutung Mission Khawmpi 2026 ah zong Mission Field te a zong sepding ineite sumlepai kitahsapna a um zieha kisem theilou um ahidan Synod Executive Secretary in hing gen a, poi mama.

I Synod in ahing peipi dankhat local hattuum in Biehinna alam chieng in atungkhuna ding panpina pe zel hi. Hinanleh localte apat sumdon paidon leh asuina dang ahing kichinlou chie alawngaina umlou Sawm-a-khat khah mai vai chi in hattuumte kithukim in Synod tun nawnlou chibang um mawh hi. Hattuum khenkhat kia in local/Biel Pastor tung ahiei District/Presbytery/ Synod tung a lunkimlouna bang ahiei anei a ngaisah pai ahisih uleh laithot tungtawn a ut teng gensuh chibang, Synod apat pawtkhie

a Local hattuum a kipuoh bang sawmpai mai chivel zong thutha hing hi seng nawnlou a, dahuoi isah banah ngaitua tham ching hi. Tamte apat hattuum lamkaite leh Pasian thaunilh Pastorte kizatat zou tahtahlou ahisihle zatat thei dinga um zoulou uh ahizaw diei chibang ngaidan um hi.

Tambangte bangchi dan a hing umthei ahiei chi I ngaitua chiengin aban ban in mawpuohna kinei chi muthei in um hi.

**Local Hattuum:** Local hattuum in mawpuohna lianpi nei a, Biehin, Pastor Quarter leh Sunday School building lam chivel apoimaw vot ahilai in Sawm-a-khat khah hiallou in atunna ding mun tan tungsah in isep ding dawl semlei deisah huoi isa hi. Biehin akilam chiengin khomipite a dinga ahunchet chi kilam theilou a alianzaw, a tanzauzaw, District/Presbytery khawmpi tanbeh zintun theina ding chi idei chiet ua ahiding ma ahi hi. Hinanleh a lianzaw ihing lam chiengun sum le pai ah kichinlouna hing um theizel hi. Tami zong a suhveng dan umthei dingin gintat huoi hi.

Synod nuoi ah 2025 calender a record dungjui in khuo/veng 78 um a tuate lah ah tunai in hattuum/khuo 20 bangin Sawm-a-khat khah or sunglou

ahisihleh hoitah in sunglou uh chi muonhuoitah apat thei thei in um hi. Tualeh I muon mama thaunil khekhat sawm-a-khat I et chiengin kumkhat sunga hujat mu a hingthei ahi ule lamdang na e chiding tamkhop um hi. I Synod summuna naah khu Sawm-a-khat ahia silpieh dangte ahile tuabang lawm lawm in tamlou hi. Synod khu local hattuum ah kinga mama china ahi. Tuaziehin Synod summuna nah ahoilou a ahile a pawtkhia hoilou ding chi theisa himai hi. Tuaziehin I tudinmun ah Synod hat hen ichi a ahile silpieh pibawl ngai hi.

**Pastorte:** Pasian thaunil Pastorte in hattuum sungah panmun poimaw pen luo uh chi lei kigen khiallou ding hi. Pastor khenkhat hattuum toh kituohlou chibang zah ahichieng in puohnat huoi mama hi. Pasian thupieh zui zieh a hattuumte dehngam ahi ule tuami kipahuoi ahi hi. Hagaulam a thuhil sia ahi mai uh hilou in tahsa lam ah zong lam tuomtuom a thuhil leh apoimawna mun a mi phawhhil/tai ngam dingin hing um ule ideisah ahi. Thudih khu adih chipi ngam leh dihrou khu dihrou ahi chi ngam ki poimaw hi. Tuami anop pen hikholsih va hinanleh Pasian nna sep khu anop zieh a sem hilou a, apoimaw zieh a sem ihidan ngaitua tha jel lei ichi hi.

**Synod:** Zou Synod in Session Khawmpi 22 vei bang kizangta kipahuoi mama hi. Pasion hoina leh a mapuina kitang ahidan thei thei in um hi. Christ suongpi kip tunga kilam hattuom hilou hilei tam tan kitung dingin gintat huoilou hi. Hinanleh sepding leh khantouna ding tamtah inei nalai hi.

**i) Sum kengding hoitah nei poimaw:** Silpieh vel a kingah ham ham chi itawpsan poimaw sa ihi. Sil huoplian zaw in enthei talei deihuoi mama hi. Sum kengding hoitah inei uh poimaw mama hi. Manggam nna sem ihi ua I semtute leh Mission Field in a poimaw ipiehzou poimaw hi. Bang chi in pan ila ta diei? I khung nai a um EBCC hattuom te in Office thupitah anei banuah School, Centenary Hall leh akiim vel ah inn lam in tuachi'n hall zah man leh innluo man muthei ua hamphatpi mama uhi. Unau Mizo te in School leh Synod Hall hoitah nei ua summuna hoitah suoh hi. PCI (R) te in College anei uh nasatah in hattuom mite in hamphatpi uhi. Mizoram Synod te in Bible zilna College leh Damdawi inn chite anei tei tei uhi. A bonin genseng sih vai hinanleh igente in kitoudelna ding sumnah hoitah anei dan uh igen utna ahi hi.

**ii) Office mun:** I Synod Office khu tuhun toh kituoh nawnlou a, amun aneu banah office zong kom seng hi. Mun thovengtah ah Synod Office lam theih hilou ama? Hall liantah toh kithua in tuachi'n Khawmpi lian ZPYF General Conference leh Synod Khawmpi mai hilou PCI level Assembly khawmpi te nasan zintun theiding in kibawlleh duthusam ahi hi. Tami igen lai in kum 3/4 sungin hing um pai va ichi sih a hinanleh a umthei sil ahi ichi ut ahi hi. Tambang nei lei hattuomte in Khawmpi a ding chi in Biehinn lianpi I sum muna in a daizoulou tan tan lam hing ngai nawnlou ding hi. Office khu Lamka khopi sese ah koih ding chi umlou hi. School ahisihle College chite, Bible School chite khopi ah aum tei tei ding china thu umlou hi. I maban en kawm in Singngat tang ahisile Tuining chivel ah zong apoina bangma umlou hi.

**iii) Stationery leh printer:** Tuni tan Zou Synod in Printer hoitah akineilou ziehin Khawmpi programme, Session Minute bu, banner leh Sunday School laibu chite sum tamtah seng in um zing hi. En zong Offset printer hoitah khat kinei hile lai sutman a I sum seen uh zakhat lah ah 60 (60%) kiem zou ding hi. Synod, Presbytery, District leh local tan in mantawm in zang phatuom dinga

I laibu leh labu te mundang ah sutkhiet ngai sese lou in eiman iki bawlthei dinga tuachi'n Khawmpi leh vaiguon khatpou a I gelhdan kibangloute zong hing kibang mai ding hi.

**iv) Office a semtute:** Khopi pawlam apat poimawna tuom tuom zieha Synod Office hoh te phunna khu "Office a semte in mi ngaisahlou/theilou uh" achi ban uah "Pastor khenkhat in office a iki tuahpi chieng nasan in mihoupi lou uh" chi belap uhi. Pastor leh Office a semtute in miteng ana mai et uhenleh houpi uheh ichina ahisih hinanleh themkhat \*Courtesy neithe i ule deihuoi hi. Office va hohte a dingin 'visiting room' chibang zong neih poimaw mama hi.

Office ah meeting aum chia min vakhum in meeting a hoitah a pang khollou TA/DA la chivel zong umla lou chi hinalai hi. Tuni in igente thakhat a septheih leh zuih theih pai zong um dinga tu a hithei pailou zong umding hi hinanleh awl awl a ibawl theih itup dinga hoih ahi hi. Jesu nua izuina ah Christ Suangpi kip tunga idin theina dingin pan ilah masat poimaw hai. Igen bangin nang le kei in mawpuohna nei ihi. Hattuum khantouna ding, hattuum hatsemna ding leh Pasian

gam kehletna a masawn semna dingin silhoi ithei te semkhe vai. Silkhat pou pou awlnou nou a sep thei um a khenkhat ahikia leh seppat thei zong um hi. Tu in tami igente senna ding ngen, sum ibuoi lai lai in ichi maithei. Hinanleh khenkhat mipi apat lahkawm/donkhawm theih um dinga, khenkhatk hattuum in a puohkhiet theih bang um ding hi. Eite tahsap khu khat le khat kisuhhat tua, ki tha pieh tua ahi hi.

Zou Synod hichin peitou jel henlen Synod lamkaite leh semtute buoi tou jel uheh ichile I peidan ngeina uh ahoipen hiding a, hinanleh khantoulam masuon va ui ichi a ahile ikipat ngai ta hi. 2010 masanga MGP Office ah Synod um nalai a, 2030 chiengin hattuum dang office te hing kiheng mama ta dinga, eite in panlahna ineilou ua ahile I Office uh ahima hijing dinga, ivan neite (infrastructure) te zieh a Pastor zatathuoi leh Pasian gam a mithupi nasan I zintun ngamlou hun hing um ding hi. Hagau lam a khang hat mama in tahsa a bangma khanna umlou chi a um thei diai? Deisah kinei seng a igenval ahisihle igenkhiel a umle Pasian min in ki ngaidam va ui.

***Kup ut nanei leh  
tkhualzou@gmail.com ah aw.***



# *Thawkiana chi nite*

Bible tang teel: Johan 11:43-44; Johan 20:1-7

*Rev. Kamminthang, Delhi*

Thumapui: Pasion mapuina toh kum 2020 mel hing musah a, thawmging hoilou tampite kawmkal a gingtute dia i ni poimaw uh Palm Sunday, Good Friday leh Easter Sunday hate bang mu leh zang thei kia dinga i um zieh un i bieh Pasion in thupina tangta hen.

Tamna a tunga i Laisiengthou tang teel tegel apat in thawkiana chi nite thupi a zang in Pasion thu houlim lei ka nuom hi. Tualeh simtu zousie nang leh kei bang pen ah i thoukia ei chi ana kingaituo dingin Pasion min in ka hing chiel masa hi.

Khovel/leitung ah hattuum chi tuomtuom tampi a um a etsahna'n: Hindu, Islam, Buddhist, Sikh leh a dangdangte a um hi. Tamna hattuum mukhie (founder) a um chiet ua, hinanleh koima hattuum mukhetute i Mangpa Jesu Khrist bang a thoukia a um sih uhi. Ama bou ei Khristian-te apen Laisiengthou gen ma bangin ni thum ni in shina apat in ahing thoukia hi. Tami ahi Khristian-te ginna ahoi leh a muon-umna. Sakhuo dangte toh i kibahlouna uh, shina apat ahing thawkiana ahia, hing thou kia sihleh nang leh kei ginna pen shi ahiding hi. Hinanleh shina apat ahing thawkia zieh in i ginna uh a dih a, ahing a, abukim ahi.

Laisiengthou Khantanhoi Johan 11:43-44 leh 20:1-7 ah i etleh Lazar leh i Mangpa Jesu thawkiana thu Johan in amu dan leh athei dan in

ana gel hi. Tamna atung a shina apat a thoukia tegel apat gingtute'n zong zil ding um ahiman in Pasion thu a i kikum ding uhi.

Bethany khuo a um Lazar kichipa a shina ni lii aphah zou in, Jerusalem akipat in i Mangpa Jesu tuomi khuo zuon a ang pei laitah in a sanggam nu Martha in Lazar shi dan leh ani phaza chiengtah in ana hil siang hi. Hinanleh Jesu'n a gei a ding mipite Pasion in ahing sawl chi a theisah nuom zieh in ni lii han a um Lazar a kaithouta hi. Tuachin Lazar akituomna puonte toh hankhuh apatin Mangpa thupieh bang in ahing thou khie a, akituomna puonte phel a peisah dingin thu a peta hi.

Tuama bangin khantanhoi Johan ma in i Mangpa Jesu Khrist thawkiana thu zong ahing gen kia a ashi ni apat ani thum ni in Laisiengthou gen mabang in i Mangpa han apat in ahing thoukiata hi. Mari Magdelene zingkal khovah in hankhuh ah ava peitah chieng in hansuong kihong sa leh a sunga koima um nawnlou chi ava mutah chieng in Simeon Peter leh nuazui dangte kungah ava hilta hi. Tuachiin sil umdan enkhe dingin

hanlam a zuonta uhi. Han ang tun tah chieng un i Mangpa kituomna puonte khu han sung a um amuta uhi.

Thawkiana chinite lah a nang Lazar bang a na kituomna, na hindan lui taisan zoulou a thoukia nama?? Ahisileh i Mangpa Jesu Khrist in akituomna puonte a nuasie bang a, na nidanglai hinkhuote nuasie a Mangpa adinga thoukia na ma?? Kingaisut vai unau...

Pasian mapuina toh i gamsung uah gingtu i tamdeudeu ua, piengtha i tam mama ua, hinanleh i et vengvengleh piengtha dihtah mu ding vaang hi. I pientha dante uh dau in dawngda mama hi. Mi piengtha dihtah in hindan dih a kengtel teitei hi chi thei va ui. Tuaziehin ipienthana uh en tha chiet va ui.

Pasian a mi piengthah ka hi kichi a, Lazar bang a i Nidang lai hindan paikhiet nuomlouna toh thou khawm akitam mama mai hi. I hattuom sung leh i pawlpi sung uah, Kolossa3:5 a sawltah Paul thugen Kolossa hattuomte kungah na Nidang lai hinkhuo, na mihing luite uh pai hie un achi mabangin i Khristian hinkhuo ua i mihing lui hindante uh zah thei a hi mawngmawng sih hi. Pasian a pienthana dihtah nei i hileh i kiletsahnate, i kithupisahnate, i thutah lounate, i sum le pai ngainat tahlutnate, i nehguh tahguhnate, i mi demdemnate, i thangsiet hatnate, leh i hoilouna chintengte uh i paikhiet

ding ahi. Lazar han a ni lii um a a ui (namsie) mabangin tulai gingtu hattuom enkoltu Upa, Pastor, Mission worker, Lamkaite i seppi i lawm i guolte a dinga ki-ui siengta hi. Nang leh kei i kitheisih ua hi'n, i LCC pi ten namsie ang sa ua, i Upat pite'n dongkhol ang sa ua, i vaihawm pite'n namsie ang sa ua, i Pastor pi, i mission worker pi leh i lamkai pite'n namsie ang sa siengta unau, Lazar kituom banga i hindan luite paikhie nuomlou leh i lunggel hoiloute i paikhiet lou zieh ahi.

Biehinn sung leh pulpit tung ah vang koima hagau milou a um sih a, hinanleh pulam ah hina toh kituohlou a gamtang leh hinkhuo jahna in i mihihna dihtah a gen chieng mama zel hi.

Tuabanah i Hattuom/pawlpi sung en talei, kumpi Saul banga ei nna hoi sem leh phattuom ngai kisa mama, ahivanga belamtal leh bawngtal thau hamte i seppi i lawm i guolte'n zata chimhuoisa in ana chimtahta mama uh hi!! I innvengte bang in, i Hattuom Mipite bang in za mun simta uhi Unau.. Kumpi Saul banga panmun, sepna munhoitah Mangpa'n hing pie a, Ama deilou silte thanuom lou i nei/ i kepkep leh Saul tungah Mangpa akisia bangin ei tung ah zong i Mangpa kisia kha ding ahi. Thatlia sieng vai bangtan vei khoi sawm nalai i hiei??

Mangpa'n ama ngaisang a na hoi sem kisa a phattuom ngai kisate sang in

Ama zieh a hinkhuo heng lamdang ngam a thupuana bawlte a pom zaw hi. Tulai i Hattuum te uh aki inntehsa akineisa i tam mama ua, angaina akitam mama a aneitu akitam mama ziehin achinat lawta hi. Hattuum i chi aneitu Jesu Khrist ahia, Lai siengthou ah a enkoltu dia a se Levi chite ahi, a dangte a tosawntu ding leh Hattuum apat a va zil ding te i hi uhi. Hinanleh eilawi ngaidan pen Hattuum sung chauh a kibukhum ding thuneina teng tang ding Pastor chite apulam a koi ding ( Hattuum a sungtang lou china ahi) chite haw ahi, tambang ngaidan i nei zieh ua i bie h innte uh hawm a, aneitu dingpa Jesu Khrist in ang taisan sieng ahi.

A.W. Tozer in “God come down to simple people, God is always on the side of thirsty saints” achi mabangin ki ngaingiem a Pasian gamna sep ding ahi zaw hi.

Tuaziehin i Mangpa’n a dei khu, Ama bang a i kituomna puon namsie teng nuasie dinga ang lam-ette i hi. Tammi Easter Sunday toh kituohin hattuum mi zousie te’n i Mangpa Jesu Khrist bang a i kituomna puonte uh- kiletsahna puonsilte, kithupisahna puonsilte, bawl thei i kisahna puonsilte leh adangdangte hankhuh ah nuosie a thoukia dingin kisa tha va ui. Dihtatna leh hoina bukim toh, kingaangiemna, nunnemna, iitnaa, thuohzouna leh silhoi bukim teng toh thou dingin gingtute kisa tha va ui. I pienthana dihtah khu i hindan a hing lang khe zel ding ahi zaw hi.

Rome 6:8 in ‘eite Khrist toh shikhawm i hi tah ua hileh, Ama toh zong i hin khawm ding uh ahi’ achi ma bangin tu Easter Sunday toh i mihing luite vui mang a Khrist in a hing na lam-et bang a hinna tha toh thoukhawm dingin simtu zousie Mangpa’n hing guolzawlta hen.

## ZPWF Column

### TUNNU LIMBEL PANPITE

January leh February

1. PWF Lailam Veng, Anntang 148kg leh Daal 1kg.
2. PWF Awnchinkap Khuo, Anntang 43kg leh asum in Rs. 620/-
3. PWF Kanaan Veng, Anntang 48kg.
4. PWF Zoumunnuam Anntang 63kg.
5. PWF Thingkangphai, Anntang 125kg.
6. PWF Tangpijol, Anntang 60kg.
7. PWF Hiangdung, Anntang 50kg.
8. PWF Delhi, Anntang tang Rs. 5,000/-
9. PWF V. Bethel, Anntang 51kg.

|                                                 |              |
|-------------------------------------------------|--------------|
| 10. PWF S. Muvanlai, Anntang tang               | Rs. 3,000/-  |
| 11. PWF Buhsau, Anntang 48kg.                   |              |
| 12. PWF P. Salem, Anntang 15half kg leh asum in | Rs. 350/-    |
| 13. PWF Kuvan, Anntang 46kg                     |              |
| 14. PWF Bohlui, Anntang 30kg                    |              |
| 15. Pa Chinsuanthang, Immanuel Khopi            | Rs. 500/-    |
| 16. Esther Chingneikim, Lailam Veng             | Rs. 5,000/-  |
| 17. Manmuanching, Lailam Veng                   | Rs. 500/-    |
| 18. Nh. Lalsiemthar, Lailam Veng                | Rs. 3,400/-  |
| 19. Zou Worship Service, Shillong               | Rs. 10,000/- |
| 20. Tv. Lamminthang, Central Church             | Rs. 100/-    |
| 21. Tv. Kaplienmung, Central Church             | Rs. 2,000/-  |
| 22. Nu Manneihat, Central Church                | Rs. 2,000/-  |
| 23. Nu Chiinmuonkim, Central Church             | Rs. 4,000/-  |
| 24. Nu Nousuonching, Central Church             | Rs. 2,000/-  |
| 25. ZPCS Muollum                                |              |
| 1) Nu Vunghaulian                               | Rs. 250/-    |
| 2) Upa Chingenpau                               | Rs. 110/-    |
| 3) Nu Nuamdeiniang                              | Rs. 100/-    |
| 4) Nu Niangsianching                            | Rs. 50/-     |
| 5) Pa Thangkhanlam                              | Rs. 70/-     |
| 6) Nu Nianglam                                  | Rs. 50/-     |
| 7) Pi Dimkchannel                               | Rs. 10/-     |
| 8) Upa Suanlal                                  | Rs. 100/-    |
| 9) Hau Diamond                                  | Rs. 400/-    |
| 10) Nu Hangsuanniang                            | Rs. 90/-     |
| 11) Pa Dalminthang                              | Rs. 20/-     |
| 12) Nh. Chiinneihoi                             | Rs. 60/-     |
| 13) Pa P. david Khupsian                        | Rs. 600/-    |
| 14) Nu Chiinnuamvung                            | Rs. 90/-     |
| 15) Nu Nianngaikim                              | Rs. 1,700/-  |
| 16) Tv. Mangboi                                 | Rs. 50/-     |
| 17) Pa Min Zou                                  | Rs. 40/-     |
| 18) Tv. Tutsuankhup                             | Rs. 300/-    |
| 19) Nu Dimhoiching                              | Rs. 90/-     |
| 20) Tv. Stephen Lian                            | Rs. 200/-    |

Petu zousie Mangpa'n hing guolzawl taken.

NOTE: A dihloou kha aum le office a suhdih thei zing ahi.

Sd/- Nh. Christina Chinghatkim  
Secretary for Women's Relation

## REPORT

1. CKKP ten 14th General Conference 5th – 8th March 2026, D. Phailian ah nei na ua, ZPYF te chial na ahing bawl bang un ZPYF min in Shie Sianminlian Secretary, Tv. Lalbiahthang Asst. Secretary leh Tv. Paominlun Youth Co-Ordinator ten va uop ua tuanah ZPYF min Shie Sianminlian Secretary ZPYF in greetings pia na hun zang hi.

Tualeh Pasion nisun kikhawp in Zou Synod Choir ten zong phatna laa ki lawmtah vasa uhi.

2. PYF General Assembly in kumkhat dan a ana bawl zel PYF Seminar pen tukum ahing tung ding 17th – 19th 2026 April Chiang a um ding ahi ah, Central Tripura Presbyterian Youth Fellowship (CTPYF) ten host ding ahiu hi. Tuami PYF Seminar a pang ding in ZPYF apat palai mi li

- i). Tv. H. Hauminlian
- ii). Tv. Thangsuanlian
- iii). Tv. Kapsuanlian
- iv). Pa Kapminlun

te sawl ding ahi na ah damtah leh lawching tah a ava pang thei na ding un ithumna ua thei chiat va ui.

3. Pasion ma pui na zal in ZPYF Project committee in General Conference hun chieng a zat thei gige ding in Portable Stage bawl pat ahi a, stage khu dei dandan a design heng lamdang thei ding a ki bawl ahi. A sample et thei ding in zaw phawt ahi a, tami sample apat in aban hing ki bawl tou be nalai ding ahi.

Maban a stage hing kibawl tou zel ding ahi na a ZPYF kithuapi nuam/a pan pi ut aum a ahi leh sponsor bawl na ding kot ki hong zing ahi. Tualeh sponsor bawl ding dan azat leh alut di zat te animation video tung tawn a hing ki tah lang ding ahi na a, I ngap dan dan a pan lakhawm chiat ding in zong Pasion min a iki chial sua uh ahi.

## PATRON MEMBER-TE

|                           |                               |                             |                                 |
|---------------------------|-------------------------------|-----------------------------|---------------------------------|
| 001. Upa Gouzamang        | 002. Pu Hav. Khamchinkhup     | 003. Pu Khamzalam           | 004. Pu Chinzasuan              |
| 005. (L) Upa Liansuanpau  | 006. Pu Khamchinthang         | 007. Pu S. Dalhang          | 008. Upa Kapkhanthang           |
| 009. (L) Upa Langginmang  | 010. Upa S. Nangkhanlal       | 011. Pu S. Lamkhotang       | 012. Upa Dr. M. Lachinkhai      |
| 013. Upa Khamchinjam      | 014. (L) Upa D.K.Manlun       | 015. Upa Suankhanmang       | 016. (L) Upa Khupgou            |
| 017. (L) Upa Chinkham     | 018. Upa Ngulchinkham         | 019. (L) Rev. V. Vungzalian | 020. Rev. Retd. Kamkhosoi       |
| 021. Rev. Tualzachin      | 022. Rev. H. Nengzaton        | 023. Rev. Awnkhankhup       | 024. Rev. Dr. Hangpi Manlun Zou |
| 025. (L) Pu Tuanzapau     | 026. (L) Rev. Ginchinjam      | 027. (L) Rev. Khamzasuan    | 028. Upa T. Lamkhotawng         |
| 029. Upa Khaichinmang     | 030. Rev. Stephen Chinzathang | 031. Pu Khupkhanmang        | 032. Pu Khaidohlian             |
| 033. (L) Hav. Khamzahang  | 034. Pi Vungzanuam            | 035. Pu T. Gouzadou         | 036. Upa Liensuonkap            |
| 037. Pi Zekhochiin        | 038. Pi Hatkhanvung           | 039. (L) Pi Ngaihoiching    | 040. Pi Mankhannieng            |
| 041. Pu Goukhanmang       | 042. Pi Chingzalam            | 043. Pu S. Thianzakhai      | 044. Pi Kamkhanching            |
| 045. Pu Haukhanpau        | 046. Pu Tuallianmang          | 047. (L) Pu Dongkap         | 048. (L) Pi Chingkhanmang       |
| 049. Pi Donkhonian        | 050. Upa Henzakhup            | 051. (L) Pu Saichinpau      | 052. Pu Goumang                 |
| 053. (L) Upa Khamkhanhang | 054. Shie Laangkhanlal        | 055. Upa Khamkhanlun        | 056. Upa L. Tualkhanpau         |
| 057. Upa Jamsianmung      | 058. Upa Ginzadong            | 059. Upa Kaizathang         | 060. Pi Goizanuom               |
| 061. (L) Pi Thangneivah   | 062. Pu Khamzathang           | 063. Pi Donchin             | 064. Upa Liankhanmang           |
| 065. Pu Hauchinlun        | 066. Pu T. S. Lal             | 067. Pi Goichiin            | 068. (L) Pu T. Khupchinthang    |
| 069. Upa T. Kaizalam      | 070. Pu Paul Henkholal        | 071. (L) Pu Soikham         | 072. (L) Rev. P.C. Manga        |
| 073. Rev. Khamchinkhai    | 074. Rev. Zamlianpau          | 075. Rev. Chinzapau         | 076. (L) Rev. Kamkhozam         |
| 077. (L) Upa Chinpu       | 078. Pu Zamkhanthang          | 079. Pu Chinglen            | 080. Miss Chinhaunieng          |
| 081. Upa P. K. Sawia      | 082. Pu Goujakhai             | 083. Pi Niangkhanmang       | 084. (L) Evan. G.L. Joshya      |
| 085. Pi S. Chingkhanmang  | 086. (L) Pu Vumchinkhup       | 087. Upa Khaihenthang       | 088. Upa T. C. Pau              |
| 089. Upa Nengchinkap      | 090. (L) Upa Jamkhongam       | 091. Upa HT Manga           | 092. Nu Vahkholling             |
| 093. Pu Hauliankap        | 094. Pi Chinnu                | 095. (L) Upa Ngulzakhai     | 096. (L) Upa T. Gougin          |
| 097. Pu Ginsuanhau        | 098. (L) Upa Langminthang     | 099. (L) Rev. David K.Samte | 100. Upa T.S.K. Samte           |
| 101. Upa S.K. Khama       | 102. Pu Jamkhopao             | 103. Pu Thatang Taihul      | 104. Pu Kamkhankap              |
| 105. Bhim Prasad Ghatani  | 106. Rev. M. Kapsuanthang     | 107. Nu Chingneikim         | 108. Rev. Khupkhansuan          |
| 109. Pi Mannuamching      | 110. Rev. Kaimuanlal          | 111. Upa Nengkhanlian       | 112. Nh. Deborah Zou            |
| 113. Pu T. Kuppa          | 114. (L) Rev. Mangsuanthang   | 115. (L) Pu Lamchinhou      | 116. Upa Pauchinlei             |
| 117. Nu Kimneihei         | 118. (L) Upa Kamgenpau        | 119. Nu Niangsuannuam       | 120. Nu Ngaikhanvung            |
| 121. Pu P. Sanjiv Zou     | 122. Upa M. Kaichinkham       | 123. Upa T. Sianchinpau     | 124. Upa Sianzahau              |
| 125. Pu L. Thenkhosoi     | 126. Pu Kamsuanhang           | 127. Upa Th. Kaikholam      | 128. (L) Upa Lunchinthang       |
| 129. Pu P. Tongthang Zou  | 130. Pu H. Nehzamang          | 131. Pu Thangsuankhup       | 132. Upa M. Kamzadou            |
| 133. Pu Jamkholian Munlao | 134. Pu Sianzakhai            | 135. Upa Thanggingsuan      | 136. Pu Kapminlun               |
| 137. Pi Tingzavah         | 138. Dr. M. Limlunthang Zou   | 139. Rev. Hauzalian Manlun  | 140. Rev. Suanglianap           |
| 141. Rev. Ginlianmang     | 142. Upa L. Mangminthang Zou  | 143. Upa Goukhanthang       | 144. M. Thangsuansang Zou       |
| 145. Upa T. Kamchinthang  | 146. Pa Ngamsei               |                             |                                 |

## LIFE MEMBER-TE

|                             |                         |                        |                           |
|-----------------------------|-------------------------|------------------------|---------------------------|
| 001. (L) Upa T. Khupkhenpau | 002. (L) Pu M. Ginzahau | 003. (L) Pu Selzapau   | 004. Pu L.C. Pautungnung  |
| 005. (L) Pi Khamkhannieng   | 006. Pi Ngainuam        | 007. Upa Chinsuanthang | 008. Upa Shanti Kumar     |
| 009. Pu Kamkhohau           | 010. (L) Pu Khamkhohau  | 011. Upa Khamzathang   | 012. Upa Chinkhanthang    |
| 013. (L) Pu Tongzathang     | 014. Pi Chiinneilam     | 015. Upa Kulthang      | 016. H/Sm. Upa Kaichinpau |
| 017. Pi Niangzalam          | 018. Upa P. Doukholun   | 019. Pu Kapminlian     | 020. Upa P. Nehgin        |





# ZOU PRESBYTERIAN CHURCH SYNOD

---

## NI KHAT UPATE KIKUPKHAWMNA

***Amun:***

MGP Golden Jubilee Hall,  
Synod Office

***Ani:***

March 26, 2026 (Thursday)

**Nitah Anneh hum:**  
4:00 PM

**Hunpat hum:**  
10:30 AM